



Pa: Jan Poels

EFRAIN BENITA COORDINADOR DI UN CONSERVATORIO NA ROTTERDAM HULANDA

Recientemente tabata di vacacion na Aruba nos gran artista Arubano Efrain Benita, cu actualmente ta residencia na Hulanda. Pa e generacion nobo cu no conoce Efrain Benita, Den Ambiente tin un biografia cortico di e gran cantante aki. Den su temponan di juventud Efrain tabata forma parti di e "Rock band" "The Key", den añanan '72 y '73. Despues cu nan a cosecha hopi popularidad den e juventud, nan a dicidi di lanta un orquesta cu yama "La Re Encarnacion", cu porcierto Den Ambiente mes tabata "set up" nan instrument. La Re Encarnacion tabata un di mihor orquesta di Antillas es tempo ey, nan tabata toca tur e hitnan di e temponan ey, sea nan tabata salsa, beat, merengue, tumba etc, nan estilo tabata unico den Antillas. La Re Encarnacion tabata forma pa musiconan di alto nivel p.e. Walter Thijssen, Wiwi Peña, Kenneth Samsom, Ronny Colmenaris, (e cuatro nan aki actual Super Mania), Benny Vrolijk, Baldo, Lucio Rivadeneira, Alex Odor (q.e.p.d.), Sjonme Streden, Eddy Giel, Edwin Abath, Efrain Benita y nan manager tabata Buchi Wouters (actual Musical Time).

Na aña 1975 tabata un gran aña pa Efrain y La Re Encarnacion. Den es aña aki Efrain a triunfa como Rey di Tumba, cu e tumba "Ta Bo Asunto", mientras Lord Boxoe a bira Calipso King. La Re Encarnacion tabata un orquesta cu tabata goza di popularidad tanto cerca e teenernan y e grandinan. Na aña 1977 Efrain a bay canta den Tamarijn Beach Hotel, despues cu el a ricibi un contract fabuloso.

Na aña 1981 Efrain Benita a sali ganador absoluto di Festival O.T.I. Antillas, cual ta un di e Festivalnan mas importante den carera di un Artista. Den e mesun aña aki el

a representa Aruba y Antillas dignamente na Mexico.

Na final di aña 1984 Efrain y Sharon Rose a forma duo Melao, cual segun Efrain tabata e acto mas profesional, y exitoso den su carera artistico na Antillas.

Nan tabata tuma tur nan tempo pa combina nan ideanan, pa asina duna un bon presentacion den nan shownan.

Nan tabata e unico artistanan cu tabata presenta shownan grandi den Hotelnan tanto aki na Aruba, Corsow y St. Maarten.

Den nan existencia nan a produci un L.P., cual nan hit tabata "Purba di nobo unbez", y tambe un potpourri di tur e cancionnan inolvidable di nos leyenda Artista Padu Lampe, como un Homenaje na Padu. Porcierto cu nan tabata e prome Artistanan cu a duna Padu Del Caribe un Homenaje.

Despues di tur e exitonan aki, Efrain kier a logra mas, y a dicidi di bay purba su suerte na Hulanda na aña 1985.

Prome cu el a tuma e decision di bay Hulanda e tabata tin contactonan cu un promotor Aleman Jan De Kock.

Su prome presentacion tabata den "Des Indiches Hotel", un Hotel masha luhoso mes.

Su contract cu e promotor Aleman Jan De Klock, no a

dura mucho, pasobra durante su presentacion na dicho Hotel, el a wordo describie pa un di e impresario practicamente mas grandi di Hulanda, Lou Van Rees.

Lou Van Rees ta e impresario cu tin e unico derecho pa contrata artistanan grandi manera, Frank Sinatra, Lacia Minelli etc. Lou van Rees a ofrece varios contratonan riba barconan di turista. Un di e barco di turista tin capacidad pa 600 crucero, cual cada siman ta cambia di turista.

E turistanan aki ta hendenan di clase mihor bisa millonarianan. Riba e barconan aki Efrain a bishita paisnan manera Africa, Marruecos, Spanja, Venecia, Italia, Inglaterra, Alemania, Belgica, y Francia. Na Monaco el a yega di actua pa un doño di Casino, den un Nightclub masha luhoso.

Su shownan ta estilo Mericano, pero e momento mas interesante ta cu ora e introduci su mes cu e ta di Aruba. Esaki ta tuma lugar mei mei di su show, y ta canta un wals of un tumba na papiamento, pa asina e "guestnan" cera conoci cu nos idioma.

Segun Efrain cu riba barco di turista ta hopi "great" pero bo tin cu tene consideracion cu tur ora bo ta leeuw for di cas. Actualmente Efrain ta coordinador di un Conservatorio na Rotterdam, camin-



da ta solamente cuatro persona so inclui e tin e yabi di e Conservatorio aki.

Tambe e ta skirbi y composa cancionnan pa dos "uitgeverij" na Belgica. Dos di su cancionnan a yega asina leeuw di sali riba disco, y cu te asta a subi riba top 10 na Belgica. E dos cancionnan

aki ta "I MISS YOU SO", canta pa Didiee, y e trio ta "TELL ME WHY", canta pa Rene.

Na october proximo e tin un otro cancion nobo, "CRY O NICHT", cual lo ser canta pa Didiee.

Fuera di ta coordinador y skirbi, e ta duna shownan na

varios camindanan nan Hulanda. Actualmente e tin un grupo di jazz forma pa dos Yugoslavia, dos Belgica y un Aleman.

Na September e tin pensa di lanta un grupo di jazz latino, cu e musiconan Johnny Schaarbaai y Reno Steba. Durante su bishita na Aruba, e ta haña cu ainda e musiconan ta bringa hopi pa wordo reconoci. Segun Efrain cu tin hopi trabao pa e musiconan den Hotelnan. Su deseo ta pa mira artistanan local riba escenarionan di hotel. Na final di e entrevista aki tambe e ta desea pa un dia e por duna un di su shownan aki na Aruba.

TELEFON DI DIARIO
22207 - 26747 - 32352
35023 - 35026